

讀通鑑論

冊一

讀通鑑論

四部備要

史部

上海中華書局據船山遺

書本校刊

桐鄉

陸費達總勘

杭縣

高時顯輯校

杭縣

吳汝霖校

丁輔之監造

讀通鑑論目錄

第一卷 秦始皇二世

第二卷 漢高帝 惠帝 文帝

第三卷 景帝 武帝 宣帝

第四卷 昭帝 宣帝 元帝

第五卷 成帝 哀帝 平帝 王莽

第六卷 漢更始 光武

第七卷 明帝 章帝 和帝 安帝附 殤帝

第八卷 順帝 桓帝 靈帝

第九卷 獻帝

第十卷 三國 魏文帝 蜀文帝 吳大帝

第十一卷 晉武帝泰始元年起

第十二卷 惠帝 懷帝 愍帝 東帝

珍做宋版印

第十三卷 元帝 明帝 成帝 康帝

穆帝

第十四卷 哀帝 帝奕 簡文帝 孝武帝

安帝 恭帝

第十五卷 宋武帝 營陽王 文帝 孝武帝

前廢帝 明帝 後廢帝 順帝

第十六卷 齊高帝 武帝 鬱林王 明帝

東昏侯

第十七卷 梁武帝 簡文帝 元帝 敬帝

第十八卷 陳高祖 文帝 臨海王 宣帝

後主

第十九卷 隋文帝 煬帝

第二十卷 唐高祖 太宗



第二十一卷 高宗 中宗

第二十二卷 睿宗 玄宗

第二十三卷 肅宗 代宗

第二十四卷 德宗

第二十五卷 順宗 憲宗

第二十六卷 穆宗 敬宗 文宗 武宗

宣宗

第二十七卷 懿宗 僖宗 昭宗 昭宣帝

第二十八卷 五代上

第二十九卷 五代中

第三十卷 五代下

卷末 敘論

讀通鑑論卷一  
衡陽王夫之撰  
船山遺書本

秦始皇

兩端爭勝。而徒爲無益之論者。辨封建者是也。郡縣之制。垂二千年。而弗能改矣。合古今上下皆安之。勢之所趨。豈非理而能然哉。天之使人必有君也。莫之爲而爲之。故其始也。各推其德之長。人功之及人者而奉之。因而尤有所推以爲天子。人非不欲自貴。而必有奉以爲尊。人之公也。安於其位者。習於其道。因而有世及之理。雖愚且暴。猶賢於草野之罔據者。如是者數千年而安之矣。疆弱相噬。而盡失其故。至於戰國。僅存者無幾。豈能役九州。而聽命於此數諸侯王哉。於是分國而爲郡縣。擇人以尹之。郡縣之法。已在秦先。秦之所滅者七國耳。非盡滅三代之所封也。

則分之爲郡。分之爲縣。俾才可長民者。皆居民上。以盡其才。而治民之紀。亦何爲而非天下之公乎。古者諸侯世國。而後大夫緣之以世官。勢所必濫也。士之子恆爲士。農之子恆爲農。而天之生才也。無擇。則士有頑而農有秀。秀不能終屈於頑。而相乘以興。又勢所必激也。封建毀而選舉行。守令席諸侯之權。刺史牧督司方伯之任。雖有元德顯功。而無所庇其不令之子孫。勢相激而理隨以易。意者其天乎。陰陽不能偏用。而仁義相資以爲亨利。雖聖人其能違哉。選舉之不慎。而守令殘民。世德之不終。而諸侯亂紀。兩俱有害。而民於守令之貪殘。有所藉於黜陟。以蘇其困。故秦漢以降。天子孤立無輔。祚不永於商周。而若東遷以後。交兵毒民。異政殊俗。橫斂繁刑。艾削其民。迄之數百年而不息者。亦革焉。則後世生民之禍亦輕矣。郡縣者。非天



子之利也。國祚所以不長也。而爲天下計利害。不如封建之滋也多矣。嗚呼。秦以私天下之心。而罷侯置守。而天假其私。以行其大公。存乎神者之不測。有如是夫。世其位者。習其道。法所便也。習其道者。任其事。理所宜也。法備於三王。道著於孔子。人得而習之。賢而秀者。皆可以獎之。以君子之位。而長民。聖人之心。於今爲烈。選舉不慎。而賊民之吏。代作。天地不能任咎。而況聖人。未可爲郡縣咎也。若夫國祚之不長。爲一姓言也。非公義也。秦之所以獲罪於萬世者。私己而已矣。斥秦之私。而欲私其子孫。以長存。又豈天下之大公哉。

孔鮒藏書。陳餘危之。鮒曰。吾爲無用之學。知吾者爲友。秦非吾友。吾何危哉。嗚呼。能爲無用之學。以廣其心。而遊於亂世。非聖人之徒。而能若是乎。詩曰。握粟出卜。自何能穀。

穀者在我而已。何用卜爲。屈其道而與天下靡。利在而害亦伏。以其道而與天下亢。身危而道亦不競。君子之道。儲天下之用。而不求用於天下。知者知之。不知者以爲無用而已矣。故曰其愚不可及也。秉道以自安。慎交以遠物。存黃農虞夏於盜賊禽獸之中。奚不可穀。而安用卜爲。莊周懲亂世而欲爲散木。言無用矣。而無以儲天下之大用。握粟憂深而逃羿穀。其有細人之情乎。知進退存亡而不失其正。易簡以消天下之險阻。非聖人之徒。其孰與歸。

商始興而太甲放。周始興而成王危。秦并天下而扶蘇自殺。漢有天下而惠帝弗嗣。唐則建成死於刃。宋則德昭不令其終。汜乎建文之變而僭尤烈。天下初定。人心未靖。則天命以之不康。湯武且不能弭。後代勿論已。然而胡亥殺兄。旋以死亡。太甲成王。終安其位。則伊尹周公之與趙高。

相去不但若霄壤也。秦始皇之宜短祚也。不一而莫甚於不知人。非其不察也。惟其好諛也。託國於趙高之手。雖中主不足以存。况胡亥哉。漢高之知周勃也。宋太祖之任趙普也。未能已亂。而足以不亡。建文立而無託孤之舊臣。則兵連禍結。而尤爲人倫之大變。徐達劉基。有一存焉。奚至此哉。雖然。國祚之所以不傾者。無諛臣也。

## 二世

陳嬰之不自立也。周市之不王魏也。其情均也。而周市賢矣。市曰。天下昏亂。忠臣乃見。義之所不敢出。害不敢自之。而遠居尊以爲天下不義之魁。負且乘。致寇至。灼然易見。而人不能知。非不知也。無志義以持其心。流俗之蠱之者進矣。陳嬰非幸而有其母。亦殆矣哉。市之一言。所謂大浸稽天而不溺。疾雷破山而不震者乎。陳餘自矜儒者。而不

能守義以自王。周市雖死而如生。陳餘碌碌以死。又何稱焉。

李斯之對二世曰。明主滅仁義之塗。絕諫爭之辯。犖然行恣睢之心。盡古今槩賢不肖。無有忍言此者。而昌言之不忌。嗚呼。亦何至此哉。斯亦嘗學於荀卿氏矣。亦嘗與始皇謀天下而天下并矣。豈其飛廉惡來之所不忍言者而言之。不忌。斯之心其固以爲然乎。苟非二世之愚。卽始皇之驕悖。能受此言而不譴乎。斯抑謂天下後世之不以己爲戎首。而無所恤乎。無他。畏死患失之心迫。而有所不避耳。夫死亦何不可畏也。失不可患而亦何必於失也。前所以自進者非其道。繼所以自效者非其功。後所以自保者非其術。退所以自置者無其方。則失果可患。而死果可畏。欲無畏無患。以不言其所不忍言。又奚得乎。天下無必死之

塗而亦無可幾幸之得。正志於早而後無所迫。則不忍不  
敢之心以全。早不能圖度於正。迨其後失有形。死有機。雖  
欲不爲此言而不得。不待上蔡東門之歎。肺肝先已自裂。  
斯豈果無入之心哉。易曰。履霜。堅冰至。辨人於早。不若自  
辨於早也。

人皆有不忍人之心。而衆怒之不可犯。衆怨之不可任。亦  
易喻矣。申商之言。何爲至今而不絕邪。志正義明。如諸葛  
孔明。而效其法。學博志廣。如王介甫。而師其意。無他。申商  
者。乍勞長逸之術也。無其心而用其術者。孔明也。用其實  
而諱其名者。介甫也。乃若其不容掩之藏。則李斯發之矣。  
李斯曰。行督責之術。然後絕諫爭之路。申不害曰。有天下  
而不恣睢。命之曰以天下爲桎梏。諍爭絕。桎梏脫。則雖日  
勞於刑名文籍之中。而耽酒嗜色。佚遊驕樂。可晏享而不



輟。苟未忘逸豫之情者。惡能不以此爲兩得之術哉。任法則人主安而天下困。任道則天下逸而人主勞。無一切之術以自恣睢。雖非求治之主。不能高居洸瀆於萬民之上。固矣。以孔明之淡泊而盡瘁也。以介甫之土木其形而好學深思也。然且樂奉名法者何也。儉以耳目。勤以耳目。而心思從其康逸也。賢者且然。况令狐綯張居正之挾權勢者哉。使讀李斯之言。知其爲導諛勸淫之術也。能勿覦然而汗下與。

懷王之立。非項氏之意也。范增之說。以爲從民望而已。臣主之名立。而其心不相釋。項氏成而懷王固不能有楚。懷王念此至悉。故一乘項梁之敗。而奪上將軍之權。以授宋義。義適遇其際而獲懷王之心。故與計事而大悅。非悅其滅秦之計。悅其奪項之計也。宋義壁於安陽而項羽斬之。

非憤其救趙之遲。憤其奪己之速。義之壁安陽而不進也。非欲乘秦趙之敝。欲得當以收項羽之兵也。其遣子相齊而送之無鹽也。非不恤士卒之飢寒以自侈。爲懷王樹外援於齊。而因以自固也。宋義死。諸將懼然曰。首立楚者。將軍家也。羽之情見矣。義之情亦見矣。懷王之不能終安於項氏。情亦見矣。救趙則命宋義。入關則命沛公。梁死羽孤。爲偏裨於宋義。旌牙之下。爲懷王謀項者之計得矣。而抑無以服楚人之心。幸而秦之君二世也。其相趙高也。其將章邯王離也。無有能乘臣主之隙以閒楚耳。不然。雖沛公且無以自持。况義之淺謀。羽之徒勇者乎。於是而知君臣之非獨以名爲義也。天之所秩。性之所安。情之所順。非是則不能以終日。范增立楚之說。董公縞素之謀。不足與於興亡久矣。

秦之所殄滅而降辱者。六王之後也。戍之徒之。而寡其妻。孤其子者。郡縣之民也。而剽二世之首。欲滅宗室。約楚降。而分王關中者。趙高也。故怨在敵國。而敵國或有所不能。怨在百姓。而百姓或有所不忍。狎及小人。而禍必發於小人。故曰。唯女子與小人爲難養也。聖人且難之。况中主以降乎。小人之心。智者弗能測也。剛者弗能制也。料其必不能。而或能之矣。料其必不欲。而或欲之矣。項羽之暴也。沛公之明也。章邯之怨方新也。盡天下欲食高之肉。而寢處其皮也。使高滅嬴氏之宗。開關以講於諸侯。豈能免於刀俎。而况受納地之封乎。則以智者料高。而固知其與秦相終始。以愚者料高。而亦決其與秦同齏粉也。然而必弑胡亥。以徼幸於一得。豈徒胡亥之愚。矢入幄而不覺哉。明而熟於計者。未有謂爲且然者矣。禍福之外。有無藉之欲焉。

死生之外。有無方之譎焉。俄頃之間。有忽變之情焉。利亦有所不喻。而無所不逞。而後君子莫能爲之防。故聖人且猶難之。誠哉其難之也。濡有衣裯。終日戒。終日者。無竟之辭也。舍裯躬慎微而求馭之之術。不墮其阱中者。鮮矣。孰謂秦之法密能勝天下也。項梁自櫟陽逮斬獄掾曹咎。書抵司馬欣而事得免。其他請託公行。貨賄相屬。而不見於史者。不知凡幾也。項梁楚大將軍之子。秦之所尤忌者。欣一獄掾。馳書而難解。則其他位尊而權重者。抑孰與禦之法愈密。吏權愈重。死刑愈繁。賄賂愈章。塗飾以免罪罟。而天子之權。倒持於掾史。南陽諸劉。屢殺人。而王莽不能問。皆法密吏重。有以蔽之也。設大辟於此。設薄刑於彼。細極於牛毛。而東西可以相竄。見知故縱。蔓延相逮。而上下相倚。以匿姦。閨位之主。竊非分而夢寢不安。藉是以箝天。